

दिनांक : 07.06.2026

समय : 18.45 बजे

आकाशवाणी जयपुर-अजमेर
प्रादेशिक समाचार

- भारत अर इंडोनेशिया संयुक्त आयोग री बैठक नई दिल्ली मांय पूरी व्ही- दोन्यू देशां रे बीच व्यापक रणनीतिक भागीदारी मजबूत व्ही।
- विश्व खाद्य सुरक्षा दिवस आज-केन्द्रीय स्वास्थ्य मंत्री जे.पी. नड्डा स्वस्थ भविष्य खातर सुरक्षित अर स्वच्छ भोजन री कानी सरकार री प्रतिबद्धता दोहराई।
- केन्द्रीय माध्यमिक शिक्षा बोर्ड री 12वीं कक्षा रा पुनर्मूल्यांकन खातर ऑनलाइन आवेदन जमा करबा री आज आखिरी तारीख-पोर्टल आधी रात ताई खुलेला।

अर

- मौसम महकमो प्रदेश रा 12 जिलां मांय आंधी अर मेह बरसबा रो येलो अलर्ट जारी कर्यो।

000

भारत अर इंडोनेशिया संयुक्त आयोग री बैठक आज नई दिल्ली मांय पूरी व्ही। इण बैठक री सह-अध्यक्षता विदेश मंत्री डॉ. एस. जयशंकर अर इंडोनेशिया रा विदेश मंत्री सुगियोनो करी। सोशल मीडिया पोस्ट मांय डॉ. जयशंकर कह्या के हाल रा बरसा मांय दोन्यू देशां रे बीच गहरी रणनीतिक भागीदारी व्ही है। वणा कह्या के बैठक मांय राजनीतिक, रक्षा, सुरक्षा, समुद्री व्यापार, जहाजरानी, निवेश, स्वास्थ्य, औषधि निर्माण, उर्वरक, महताऊ खनिज, पर्यटन, शिक्षा अर सांस्कृतिक समेत द्विपक्षीय इमदाद रा सगळा पहलूआ माथे गहरी चर्चा व्ही। दोन्यू मंत्री बहुपक्षीय समन्वय ने आगे बढ़ावा अर भारत-आसियान संबंधां ने मजबूत करबा माथे चर्चा करी। इण सूं पैली आप रा उद्घाटन भाषण मांय डॉ. जयशंकर कह्या के चार बरस रा अंतराल रे पछे दोन्यू देशां रा संयुक्त आयोग री आ बैठक व्ही है।

000

केन्द्र सरकार कह्यो के अंतरराष्ट्रीय एलपीजी री कीमतां मांय भारी बढ़ोतरी रे बावजूद भारत मांय एलपीजी गैस सब ऊँ कम कीमत मांय मुहैया है। पेट्रोलियम अर प्राकृतिक गैस मंत्रालय एक बयान मांय कह्यो के भारतीय सिलेंडर किणी भी पड़ोसी देश रे मुकाबले सस्तो है। सरकार कह्यो के पश्चिम एशिया संकट रे दौरान समुद्री यातायात मांय देरी रे बावजूद होर्मुज जलडमरूमध्य सूं ऊर्जा माल री आवाजाही जारी राखबा मांय सफल रह्यो। मंत्रालय रे मुजब देश मांय पेट्रोलियम उत्पादां री कोई कमी नी है अर एलपीजी री बॉटलिंग अर वितरण गतिविधियाँ सामान्य रूप ऊँ चाल री है।

000

आज विश्व खाद्य सुरक्षा दिवस है। इण बरस रो विषय **समस्या से समाधान तक-हर जगह सुरक्षित भोजन** है। ओ दिन खाद्य सुरक्षा ने एक अधिकार अर सामूहिक जिम्मेदारी रा रूप मांय मजबूत बणावा रो मौको देवे है। इण मौके केन्द्रीय स्वास्थ्य अर परिवार कल्याण मंत्री जगत प्रकाश नड्डा स्वस्थ भविष्य खातर सुरक्षित अर स्वच्छ भोजन रे कानी सरकार री प्रतिबद्धता दोहराई। सोशल मीडिया पोस्ट मांय वणा नागरिकां ऊँ स्वस्थ खान-पान री आदतां डालबा अर स्वस्थ अर आत्मनिर्भर भारत बणावा मांय योगदान देबा री अरज करी। मुख्यमंत्री भजनलाल शर्मा भी सोशल मीडिया संदेश मांय सगळा ऊँ

सुरक्षित अर स्वच्छ खाद्य पदार्थ कानी ऊँ जाग जगाबा अर स्वस्थ जीवनशैली अपणावा रो संकल्प लेबा री अरज करी।

000

केन्द्रीय युवा कार्यक्रम अर खेल मंत्री डॉ. मनसुख मांडविया आज नई दिल्ली मांय फिट इंडिया संडेज ऑन साइकिल पहल रा 77 वां कार्यक्रम मांय भाग लीना। इण मौके केन्द्रीय मंत्री कह्या के साइकिल चलाबा सू पर्यावरण ने साफ रखबा मांय इमदाद मिले है। वणा साइकिल चलाबा सू स्वास्थ्य मांय होबा वाळा फायदा रो जिक करता थकां कह्या के लोगां ने इण पहल मांय शामिल होर फिट इण्डिया रा सपना ने साकार करणो चाहिजे।

वठिने प्रदेश मांय संडेज ऑन साइकिल कार्यक्रम रे तैत केई कार्यक्रम व्हीया। राजधानी जयपुर मांय फिटनेस, पर्यावरण संरक्षण अर सतत परिवहन ने बढ़ावो देबा रा लगस सू साइक्लोथॉन राख्यी गयी इण मांय बडी सख्या मांय साइक्लिस्ट, फिटनेस प्रेमी, पढनियां, कॉर्पोरेट प्रोफेशनल्स अर नागरिक भाग लीना। इण आयोजन मांय स्वस्थ जीवनशैली अर सामुदायिक सहभागिता रो संदेश दियो गयो। इण रे सागे ई सप्ताहभर ऊँ चाल रियो जागरूकता अभियान भी पूरू व्हयो। वठी ने विद्याधर नगर स्टेडियम में साइकिल रैली निकाली गई। श्रीगंगानगर, बाड़मेर, पाली, अजमेर, सवाईमाधोपुर, कोटपुतली समेत केई ठौड़ां माथे लोगां समेत पुलिस अहलकार अर कर्मचारी साइकिल चलार लोगां ने फिट रहबा रो सन्देश दियो।

000

केन्द्रीय माध्यमिक शिक्षा बोर्ड—सीबीएसई री 12वीं कक्षा रा परीक्षा रा नतीजा जारी होबा रे पछे इण सू जुड़्या मुद्दा री जांच अर उत्तर पुस्तिकावां ने फेरू जांचबा खातर ऑनलाईन आवेदन जमा करबा री आज आखिरी तारीख है। बोर्ड रा सोशल मीडिया पोस्ट रे मुजब ये पोर्टल आधी रात तांई खुल्या रहवेला इण बीच सरकार री कानी ऊँ नीट यूजी परीक्षा ने साफगोई तरीका ऊँ करबा खातर सगळा सुरक्षा उपाए पक्का कर्या जा रह्या है। ये परीक्षा 21 जून ने व्हेला। एनटीए सोशल मीडिया माथे चाल री पेपर लीक अर उण री बिक्री सू जुड़ी बातां ने नकार दियो है। वणा पढनियां अर उण रा घर आळा सू इण बेबुनियाद बाता माथे भरोसो नी करबा री सलाह दी है।

000

राज्यपाल अर कुलाधिपति हरिभाऊ बागडे कह्या के चोखी शिक्षा देणो म्हाकी सब ऊँ पैली री प्राथमिकता व्हेणी चाहिजे। वे कह्या के ज्ञान रो पूरा समाज मांय प्रसार विश्वविद्यालयी शिक्षा सू होवे है। इण खातर सगळा ने मिलर उण ने चोखा बणाणो चाहिजे। श्री बागडे आज लोक भवन सू महाराजा गंगासिंह विश्वविद्यालय, बीकानेर रा 23 वां थापना दिवस माथे सम्बोधित कर रह्या हा। इण मौके वणा गंग नहर निर्माण शताब्दी बरस माथे पाणी बचावा रो संकल्प लेबा री अरज करी। केन्द्रीय विधि अर कानून मंत्री अर्जुनराम मेघवाल विश्वविद्यालय रा थापना दिवस री शुभकामनाएं देता थकां विश्वविद्यालयां भारतीय संस्कृति सू जुड़्या मूल्यां माथे काम करबा री जरूरत बतायी।

000

प्रदेश मांय 'अपर हाई लेवल कैनल परियोजना' ने सर्वोच्च प्राथमिकता देता थकां जरूरी काम करवाया जा रह्या है। करीब 2 हजार 500 करोड़ रिप्यां री लागत री इण परियोजना ऊँ 300 सू बत्ता गांवां री करीब 42 हजार हेक्टेयर कृषि भूमि ने लिफ्ट सिंचाई प्रणाली ऊँ पाणी मुहैया व्हेला। जल संसाधन मंत्री सुरेश सिंह रावत कह्या के आवता बरसा मांय आ परियोजनां बांसवाड़ा जिला री खेती री माळी व्यवस्था ने नई दिशा देबा वाळी खास सिंचाई परियोजनावां मांय भेळी व्हेला। इण रे पूरो होबा रे पछे किसानां ने साल भर खेती खातर पाणी मिल सकेला। वणा कह्या के इण सू जमीं मांय पाणी रो स्तर सुधरेला पाणी री बचत व्हेला अर गांवांई हलकां रा विकास ने मजबूती मिलेला सागे ई आ परियोजनां वागड़ हलका रा जनजाति बहुल इलाकां रा सामाजिक अर माळी विकास मांय मील रो पत्थर साबित व्हेला।

000

जैसलमेर मांय पर्यटन ने बढ़ावो देबा री तैयारी सरू व्हे चुकी है। शहरी हलका रा सूली डुंगर सनसेट प्वाइंट ने नगरपरिषद मॉल रोड री तर्ज माथे बणावा री खास योजना सरू करी है। नगर परिषद आयुक्त लजपालसिंह सोढा बतायो के इण प्रोजेक्ट सू नगरपरिषद ने हर बरस करीब 38 लाख 50 हजार रुपयां रो राजस्व मिलेला।

प्रदेश मांय मौसम रो मिजाज लगातार बदल रह्यो है। एक ओर केई जिलां मांय आंधी चालबा अर मेह बरसवा सूं लोगां ने गर्मी और उमस सूं राहत मिली है तो वठिने केई हलकां मांय तेज गर्मी आप रो कहर बरसा री है। प्रदेश रा श्रीगंगानगर, बालोतरा जैसलमेर, पाली, मांय तेज धूप अर गर्म हवा चालबा सूं आमजन बेहाल व्हे रह्या है। वठिने घड़साना मांय तेज बरसात रे सागे ओळा पडबा रा समचार है। चिकित्सा महकमो तेज गर्मी रे चालता आमजन सूं ओआरएस, नीबू पानी अर छाछ रो सेवन करबा अर घरां सूं सिर ने ढांकर बारे आबा री सलाह दी है। मौसम महकमो आज 12 जिलां मांय आंधी अर बारिश रो येलो अलर्ट जारी कर्यो है। इण रे इतर काल सात जिलां मांय मेह बरसवा अर दो जिलां मांय हिटवेव री चेतावनी दी गयी है।

000

पाली मांय 16वीं राज्य स्तरीय जूनियर पुरुष हॉकी होड़ आज पूरी व्ही। फाइनल मुकाबलो अलवर अर जयपुर रे बीच व्ह्यो। इण मांय जयपुर री टीम 3-1 सूं जीत दर्ज करी। समापन जळसा मांय मुख्य अतिथि राजस्थान हॉकी संघ रा अध्यक्ष अरुण कुमार सारस्वत विजेता अर उपविजेता टीमां समेत चोखो प्रदर्शन करबा वाळा खिलाड़ियां ने इनाम दिया।

000

उपभोक्ता मामलात महकमा रा ई-जागृति मंच ने राष्ट्रीय ई-गवर्नेस पुरस्कार-2026 मांय रजत पुरस्कार मिल्यो है। ओ सम्मान तकनीक रे जरिये सरकारी प्रक्रिया मांय सुधार अर डिजिटल काम खातर दियो गयो है। उपभोक्ता मामला, खाद्य अर सार्वजनिक वितरण मंत्रालय कह्यो के ई-जागृति, उपभोक्ता शिकायतां रा तुरत निपटारा मांय महताऊ भूमिका निभा रियो है। इण बरस एक जनवरी ने सरू कर्या गया इण एआई आधारित मंच माथे हाल तांई दो लाख 29 हजार सूं बत्ता उपभोक्ता मामला रो पंजीकरण कर्यो गयो है। जद के दो लाख सात हजार ऊँ बत्ता मामला रो निपटारो कर्यो जा चुक्यो है।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय 28 जून ने विचार बतावेला। आ ई कार्यक्रम री 135वीं कड़ी व्हेला। ई सारू आप ई मुफ्त नम्बर 1800-11-7800 माथे 26 जून तांई राय दे सको हो। नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

000